

唐崔令欽撰。是書唐書藝文志著錄，又總集類中載令欽注庾信哀江南賦一卷。然均不言令欽何許人，蓋修唐書時，其始末已無考矣。

嘉錫案：釋贊寧宋高僧傳卷九大唐潤州幽棲寺玄素即俗稱馬祖者。傳云：「受菩薩戒弟子禮部崔令欽道流人望，亦嘗問道於徑山。」令欽不知任禮部何官。勞格唐郎官石柱題名考，禮中禮外并無其人。

雲溪友議三卷

唐范攄撰。攄始末未詳。唐書藝文志注稱爲咸通時人。而書中李涉贈盜詩一條，稱乾符己丑歲客於雷川，親見李博士手蹟。考乾符元年爲甲午，六年爲己亥，次年庚子，改元廣明，中間無己丑。己丑實爲咸通十年。疑書中或誤咸通爲乾符，否則誤己亥爲己丑。總之，僖宗時人矣。攄自號五雲溪人，故以名書。五雲溪者，若耶溪之別名也。

嘉錫案：唐詩紀事卷七十一云：「吳人范攄處士之子，七歲能詩。贈隱者云：『掃葉隨風便，澆花趁日陰。』」方干曰：「此子他年必成名。」又吟夏日云：「閑雲生不雨，病葉落非秋。」干曰：「惜哉！必不享壽。」果十歲卒。」吳郡志卷二十六載此事，採自延賓佳話。宋史藝文志小說家，延賓佳話四卷，不知作者。唐宋遺史宋志別史類，詹玠唐宋遺史四卷。文字略同，惟「范攄」作「范攄」。紺珠集卷五、類說卷二十七同引唐宋遺史。紺珠作「范攄」，類說則作「范」。

據」，皆傳寫之誤也。唐才子傳卷七云：「方干隱居鏡湖，咸通末卒。」鏡湖、若耶溪，均在會稽。是干與攄生同時，居又同邑，固宜見其幼子。會稽於唐屬越州會稽郡，而攄實吳人，吳縣，屬蘇州吳郡。蓋僑寓也。本書卷下江客仁條云：「番禺舉子李彙征，客遊於閩越，馳車至循州，求宿韋氏之莊居。韋氏年已八十有餘，自稱曰野人韋思明。於是共論數十家歌詩，次第及李涉絕句，李生咏贈豪客詩。韋叟愀然變色曰：『老身弱齡不肖，遊浪江湖，後遇李涉博士，蒙簡此詩，因而跽跡，案紀事作「陰跡」，當從之。遠隱羅浮山。』追惋今昔，因乃潛然。雲谿子以乾符己丑歲客于雲川，值李生細述其事。彙征於韋叟之居，觀李博士手翰，冀余導於文林。」據其所言，則親見李涉手蹟者李彙征也，非攄也，提要誤矣。唐詩紀事卷五十六有李彙征一條，全採之雲溪友議。其末云：「乾符辛丑歲范攄客于雲川，雲川之誤。值彙征細述其事。」與今本作乾符己丑歲者不同。於提要所考，亦復不合。考乾符六年之間無己丑，亦并無辛丑。其辛丑乃中和元年，古今本既同作乾符，則其誤不在年號，而在干支。惟當作何字，無以定之。

所錄皆中唐以後雜事，如記安祿山生於鄧州南陽，與姚汝能祿山事迹所記生於營州阿軻，山者不同，殆傳聞之誤。記李白蜀道難爲房瑄、杜甫厄於嚴武而作，宋蕭士贇李詩補注已駁之。他如陳子昂爲射洪令段簡所殺，在武后時。章仇兼瓊判梓州事，在天寶以後。時代